

Kalata gwa Juuta Isyakulongosya

Kalata ujũ umpimba aasimbiigwe na Juuta, ujũ aali jũmo mbaamyabo baa Jesu. Aabasimbiile kalata ujũ abiiitiki bamo, aba baataamigwaga fiijo ni manyisyo isya bamanyisi baa butungulu. Abamanyisi abo bandalaga imanyisyo isya ipyana lya Kyala, nu kubasofya abiiitiki ukutuugala nkajiilo akabiibi. Juuta aasimbile ififwanikisyo fingi ukufuma nDwitikano ulukulu, ukubakasya abiiitiki ukuumilila mbwanalooli bwa Kyala na mu Ndũmi iNunu ijaa Jesu Kilisiti, iji baajipiliike ukufuma ku batumigwa baa Jesu.

Uluponio

¹ Kalata ujũ afumile kũmyangu une Juuta, ne mbombeli gwa Jesu Kilisiti, ne gwamyabo gwa Jaakobo. Ngũbasimbila umwe mwesa mwe musunguliigwe na Taata Kyala, mukutuugala ndugano lwake, mukulindililigwa kanunu mpaka bo ikwisa Jesu Kilisiti. ² Kyala abongelepo ulupaakisyo, ulutengaano nu lugano ku bwingi.

Ukujilwila iNdũmi iNunu

³ Bakũndwe bangu ndwitiko, naaliijũulile fiijo ukuti mbasimbile isya bupoki ubu bukutubiika twesa mbũliilaniisi. Looli naagile ukuti ngũlondigwa ukubasimbila kalata ujũ, ugwa

kubapyelesya iisya limolyene ili. Mujilwilege iNdumi iNunu iji mwajambiliile ukufuma kwa Kyala kamokeene, umwe na bandu baake boosa! Mujilwilege! ⁴ Nikubasimbila kalata ujū paapo abandū bamo biijingiisye kubutiitū, nū kwijongaania na nuumwe. Abandū abo batikantiila Kyala, bikwinogona ukuti biitikisiigwe ukulogwa paapo bambiliile uluhobokelo ukufuma kwa Kyala. Ulo bankaaniile Jesu Kilisiti uNdongosi uNkulumba, uNtwa gwitū. Looli ukufuma liijolo sisimbiigwe ukuti Kyala ikwisa kubalanga kunongwa jaa mbiibi isyo.

Ififwanikisyo fingi ifya kulongigwa

⁵ Ngulonda ukubakumbusya, na paapo musimeenye kanunu isi syosa. UNtwa aabapokile mbutulanongwa aBanyaisilaali ukufuma mu ngubilo syabo nkiisu kya Misili, looli piitaasi aabapyutile abandū baake aba baakaanile ukummwitika.* ⁶ Mukumbukege boope abandumi bala, aba uNtwa abapinyile mu ngiisi ni minyololo gya bwila na bwila. Kangi aba uNtwa ikubatiima ukuti balongigwe iisiku ilya kummalikisyo, paapo baabwilile ubukulumba bwabo, nū kubuleka ubujo bwabo. ⁷ Kangi mubakumbukege abandū abaa ntwaja utwa mu Sotoma na Gomola, na bala abaa ntwaja utupalamani. Kyala aabapeele ulufundo abenekaaja abaa ntwaja tula ulwa kukosigwa mmooto ugwa bwila na bwila,

* **1:5** 1:5 Bala kalata gwa imbaliilo 14:26-35; 26:64-65.

paapo baalogwaga, nu kunyonywa ukulogwa ni mibili igi gikaja gya bandu. Ulafundo lwabo lukubasoka abandu boosa.†

⁸ Na ulu abandu aba bikwijingisya kumyinu bafwene nabo. Bikwijumbika ukuti bambiliile indagilo ukufuma kwa Kyala. Ulo bikuginyasya imibili gyabo, bikubukaana ukukulumba ubwa Kyala nu kufituka ifipeligwa ifi fikutugala kumwanya. ⁹ Looli joope Mikaili ugwandami ukukulumba bo ikujobesania nu kukaanikana na Seetano, isya kwegu umfimba gwa Moose, akaagelilepo ukunsitaaka Seetano kunongwa jaa maheelu gaake. Looli aajobile aatile, “Umtwa Kyala jaju akukemele!”‡ ¹⁰ Looli abandu aba kufituka fyosa ifi bakafimanya. Akabalilo aka bikusibomba isyo kisita mahala, bo ulwa finyamaana ifi fikaja na mahala, aabikupyutigwa na Kyala. ¹¹ Ahili! Bajikongile injila jaa Kaini ijaa kubomba imbiibi.§ Bakongile akajilo kaa Balaamu, ujua aabasyobile abandu kunongwa jaa ndalama.* Aabikupyutigwa paapo bikusambuka bo ulwa Koola, ujua aapyutiigwe kunongwa jaa kusambuka.†

¹² Abandu aba boonangi bo mubungeene pakwipuuta pamopeene nu kumenya ikisyese ndugano. Bikulya itolo kisita soni. Abeene bali bo abatiimi aba bikwipaasya beene itolo. Kangi ngati mabingo aga gikugutigwa nu mbelo

† **1:7** 1:7 Bala kalata gwa Ubwandilo 19:1-24. ‡ **1:9** 1:9 Bala kalata gwa Sakalija 3:2. § **1:11** 1:11 Bala kalata gwa Ubwandilo 4:1-16. * **1:11** 1:11 Bala kalata gwa Imbalilo 22:4-35; 31:16. † **1:11** 1:11 Bala kalata gwa Imbalilo 16:1-35.

kisita kutwala ni sajo sya fula.‡Kangi ngati mipiki igi gikaja ni seke akabalilo kaa ntondolo, ginyukuliigwe gyosa gyamile. ¹³ Imbombo syabo isya soni, sili bo untotoofula ugwa majiga amakali aga gikumalikila kumbali kwa sumbi. Sifwene bo indondwa isi sikabagila ukututuula. Kyala ababiikiile ubajo ubwa mu ngiisi inywamu bwila na bwila.

¹⁴ Enoki, umwisukulu ugwa buhaano na bubili ukufuma kwa Atamu,§ aajobile ubukunguluka ubwa bandu aba, aatile, “Keeta, uNtwa ikwisa pamopeene na bandumi baake abiikemo abingi fiijo, ¹⁵ ukuti abalonge boosa, fiijo ukubafunda aba bakantiilaga Kyala. Ikwisa kubalonga kunongwa jaa mbombo syabo syosa isi babombile kisita kuntiila Kyala, pamopeene na masyu goosa amabiibi agaa kummwilaamwa paapo bakantiilaga.”* ¹⁶ Abandu aba bikwibuneesya nu kwililiisya, bikufikonga ifinyonyo fyabo ifibiibi. Bikwituufya fiijo nu kubatuufya fiijo bamo, ukuti bakabemo.

Ubukunguluka bwa batumigwa

¹⁷ Looli umwe bakundwe, mukumbakege isi baajobile abatumigwa† baa Ntwa gwitu Jesu Kilisiti. ¹⁸ Baatile, “Amasiku gaa kummalikiisyo aabikwisa abandu abaa kwila, aba bikukonga ifinyonyo fyabo ifibiibi.” ¹⁹ Abandu aba

‡ **1:12** 1:12 Bala kalata gwa Isya Mbupingamu 25:14. § **1:14** 1:14 Bala kalata gwa Ubwandilo 5:21-24. * **1:15** 1:15 Ubajobi ubu bufumile mwa baakalata bamo aba baasimbiigwe na Bajuta, bakajamo mu Bibilia. † **1:17** 1:17 Abatumigwa Bala ku Isyakulingaania.

bikubatikania. Bakaja na Mbepo gwa Kyala, looli indumbula syabo sikusyala pakiisu apa.

Ukubatuula aboonywa

²⁰ Looli umwe bakundwe, mwimege kanunu ndwitiko lwinu, ulu lwikemo fiijo, kangi musumege ku maka agaa Mbepo Mwikemo.

²¹ Mwendelelege ukwambilila ulugano ulu lukufuma kwa Kyala, bo mukunnguulila uNtwa gwitwa Jesu Kilisiti. Abapaakisyeye ukuti mwambilile ubumi bwa bwila na bwila.

²² Mubapaakisyeye abangi aba bikwilaamwa,

²³ bamo mubapokege ku njila jaa kubanyaka mmooto, bamo mubapaakisyeye. Looli mwikeetege, mugukalalilege nalinga mwenda

ugu gubiikiigwe amababye ni mbombo imbiibi.

Ulwipuuto ulwa nduufyo

²⁴ Kyala jo ujw ali na maka agaa kubalindilila ukuti mulingasoba, looli ikubatwala umwe nkyeni mbusisya bwake ubukulumba, pamopeene nu lusekelo ulukulumba, kangi kisita mababye gogoosa agaa bubiibi.

²⁵ Umwene jo Kyala mwene, uMpoki gwitwa. Ubusisya, ubukulumba, amaka, ubulagili buli nu mwene, ku njila jaa Jesu Kilisiti uNtwa gwitwa, ukufuma liijolo, na ulu, na bwila na bwila. Amenii.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

14ff4521-53e4-562c-aacb-6f4faf55a6c8